

Fundacion Salud Mental Respaldo a presenta e Aspiratie 2030 y logo nobo



DIAMARS anochi Prome Minister Evelyn Wever-Croes tabata presente na Fundacion Salud Mental Aruba, Respaldo, pa presentacion di e Aspiratie 2030 y e presentacion di e logo nobo di e fundacion. Respaldo ta un fundacion cu desde aña 2017, a dedica su esfuerzo na yuda comunidad riba e tereno hopi importante di salud mental.

Prome Minister a expresa cu esnan presente a haya un presentacion y un splicacion di e aspiracionnan y di e logo nobo. Respaldo tambe a presenta un video cu a duna un bista di e vision cu Respaldo tin pa futuro, cu ta un vision di un organisacion cu ta sigui desaroya su mes pa bira mas specialisa, profesional, y mas sostenibel cu rumbo fiho pa un Aruba mentalmente sano.

Aspiratie 2030 ta un plan cu no solamente ta pone e necesidad di bon servicio y bon tratamento di calidad na prome luga, pero tambe e importancia di sostenibilidad y inclusividad den cuido di salud mental. Prome Minister a expresa cu e compromiso cu nan a mira pa traha hunto, orienta riba e balornan cu ta fortalece nos comunidad, ta motibo pa comunidad en general ta orguyoso di un organisacion manera Respaldo aki na Aruba. Pasobra un pueblo mentalmente sano ta e fundeshi pa un sociedad sano y prospero.

“Mi kier a felicita Respaldo cu e gran paso cu nan a tuma na lansa Aspiratie 2030 y e logo nobo. E logo nobo ta simbolisa un capitulo nobo, un compromiso nobo pa sirbi nos pueblo cu amor y dedicacion. Respaldo ta un organisacion cu tin su meta pa sigura cu cada ciudadano di pais Aruba cu tin e necesidad por haya apoyo y cuido cu nan mester pa ta un miho version di nan mes. Y pa cu esaki mi kier expresa mi aprecio profundo pa e trabou dificil y importante cu e ekipo completo di Respaldo ta haci, y desea nan hopi exito den futuro.

Ban sigui construi un Aruba na unda cada un di nos por ta orguyoso di dje, na unda cada un di nos por sinti nos mes cla pa enfrenta cualkier reto nos dilanti”, Prome Minister a termina bisando.